

Epesus

Teik pasi Pol hani teka kahikahi Jises Krai ti Epesus

Kakain ti haxewai teik pepa ie

Pol tel aposel tai teik pas ie hani teka kahikahi Krai ti tehu taon Epesus sai 32 ahang muhin ti Jises moih aliawa ape Haeu waxi i hani tesol tonan. Pol tai lokon i Rom ti i kakalabusake kaxi ahutiai meng solian ti Jises Krai. I hapuasa tel tuaun Tikikus atoheniai teik pasun hani teka kahikahi Krai ti Epesus. Ti lato ridaiwa, lato kului hani teka kahikahi Krai ti taon liai. Teka seilon laha toto Epesus namilolaha lalap wanen ti ukei kilan soxi ma lawe laha lotui waliko tenen kumahe salan Haeu. Ti imat Pol kaxi ahuhuti meng solian ti Jises Krai hani teka Ju ien ti tela Sabat (Apo 18:18-21). Ape imuh i to ahang toluhu ien hahanau teka seilon (Apo 19). Leili Epesus teka Ju ma teka kumahe Ju. Pol kak nanau laha ka Haeu pahan laha hatesol to hukuma aluawa nake Jises Krai mat ukei kawatan ti lialui woi lawe seilon. Leili teik pas ie tin i kak kolongeni kako teka kahikahi Krai hani waliko tolunen. Kako masin tupui Krai ape i masin patukako. Kako masin ingi Haeu ape puki Krai se tehu kuku pate tuah ti tehu ing ien. Kako masin ka axoi Jises Krai nake kako pakata hahawane kapin.

¹ Nga Pol tel aposel ti Jises Krai ti puki namili Haeu. Teik pas ie hani amuto teka kahikahi Jises

Krais ti Epesus, teka amuto hana hatapo tupuamuto ailei puase Haeu. Amuto unau i Krais wanen.

² Nga kamei Haeu tel Tamakako ma Jises Krais tel Masiwi ti kako lehe lalu aile kola lalape solialalu hani amuto ma hatona hasolia tiamuto.

Waliko solian Haeu hani hualiakako ti usian

³ Kako kak sameniwa Haeu. I tel Tame Jises Krais tel Masiwi ti kako. I hani kako hatesol waliko solian hualiakako ti usian nake kako pakata hetekie hani Krais. Tesol waliko solian ien puki haniai Haeu, kumahe ti itan ie. ⁴ Imat ti tehu pon itan ie tanoma, hoi liai i kilamiwen kako tetan. I pakateni hetekie kako hani Krais lehe kako sohot unauan wanen ape tap tel i pon tieniakako ti tenen na waliko. ⁵ Ti lalape wawahen tetan, hoi Haeu namiloi peleiwēn i aile hasohotu kako natun nake ti Jises Krais. I aile ukek ien nake ti pahan ma i amuke ailean.

⁶ Aile ape kako kak sameniwa Haeu ti lalape soliaian i haniwen kako. I aile hasolia hawane hani kako nake ti puase Jises Krais tel pate i waheni, kumahe nake ti puasakako. ⁷ Haeu kola soliai lalape wawahen tetan ti Krais mat oxoxiakako ti kalabus ti saun lialun. Ape i oxoxi kako ti kawatan ti lialui woukako. ⁸ I hani hakila hawane kako waliko solian tenen tenen hetekie lawe anesoin ma namil tenen xewan.

⁹ Haeu hapuasa Krais ailei waliko ti i pahan. Ape i kola hatakei hani kako namilon ti teka seilon kum tioi ti imat. ¹⁰ Tenen namil ien, Haeu aile hapoponowi tataen ti i hukumini hetekie hatesol waliko ti patul ma itan ie hani hahitake Krais tel neinialaha. ¹¹ Haeu aile hatesol waliko ti i

nanamilo. Ti imat wanen, hoi liai i kilamiwen amite teka Ju tetan usiwa puki namilon. ¹² I aile ukek ien lehe amite teteka amite hong sohomu ti Kraiss imat, amite sameni hawane Haeu tel Masiwi pate tuah wanen. ¹³ Ape ao pe ie tin amuto teka kumahe Ju hongoen kakain salan, tenen meng solian ti sale Jises Kraiss awai amuto ti kawatan ti lialui woumuto. Tataen ti amuto hong sohoa ti Kraiss, Haeu hani amuto Holi Spirit masin ti i kakawen. I kilami ka amuto seilon tetan. ¹⁴ Holi Spirit ti leilokako se kikilam ka Haeu hani kako hatesol waliko ti i kakawen ma tin i oxoxi kako ti kalabus ti saun lialun nake kako se seilon tetan. Aile ape kako sameniwa Haeu tel Masiwi pate tuah wanen.

Pol lotu huali teka Epesus

¹⁵ Aile ape nga lotu huhuali amuto lilian ti nga hongoa xoxoi namilomuto ti tel Masiwi Jises ma wawahen ti amuto hani hatesol kahikahin. ¹⁶ Nga kak kemulik tatale hani Haeu nakemuto. Tapai na nga lotu, nga lotu huali amuto. ¹⁷ Nga lotu kamei Haeu tel Tamakako pate solian, i Haeu ti Jises Kraiss tel Masiwi ti kako. Nga kamei i ti haniemuto anesoin ma haxewai namilomuto lehe amuto tioi hawane i. ¹⁸ Nga kamei Haeu ti hei hawanei namilomuto lehe amuto tioi waliko ti pahan i hani amuto ti lalape soliaian. Lawe waliko ien Haeu apeseniwen haniai teka seilon tetan.

¹⁹ Tin nga kamei hetekie Haeu ti kola haniemuto kui pohen ka i xoini hatapo lawe poh liai. Tetenen poh i pupuas leilokako teka kako soh ti Jises Kraiss. ²⁰ Tenen lalape poh ien Haeu hapuasa ti hamoihai Jises Kraiss ma ti hanaian hani tesol tonan ti papan

sai manau neinia seilon. ²¹ Jises se tel Masiwi tapein ti hatesol engel ma teka spirit liai. Axan pamu tuah ti lawe masiwi. Salan wanen i Masiwi ti hatesol waliko ti aope ie ma ti i luluainima imuh. ²² Haeu hana lawe waliko hani hahitake Krai ape kilami i Masiwi tapein. Ape teteka laha soh tetan laha uke solian tetan. ²³ Krai masin ka pati teka kahikahin ti kapitialaha ape teka kahikahin laha masin tupuan. Hatesol kuiai poh ti kako hina, kako kema ti Krai. Ape hatesol waliko i momoih hahitake ngahat tetan.

2

Lalape wawahen ti Haeu kako sohot seilon haun

¹ Teka kahikahi Jises Krai ti Epesus, ti imat amuto masin seilon tenen maten nake amuto kum hani Holi Spirit kapiti amuto. Amuto tahi kakai Haeu ma aile hakila saun lialun. ² Ti lokon ien amuto aile ususi waliko ti teka seilon lialun ailele. Amuto hong usi kakai Satan tel masiwi ti teka spirit lialun laha toto he maun. I tetel i pupuas leili teka laha tale tehitolaha hani Haeu. ³ Ti imat kako hatesol masin ien. Kako ailele waliko tenen ti tupuakako pahan. Kako ususi lialui namilokako ma isiai pahakako ti ailei saun lialun. Ala i pon hawane kako uke kawatan ti lengei Haeu.

⁴ Tuahe Haeu xuhai tatahan ma i waheni hawane kako. ⁵ Aile ape ti kako tutuen hahitake saun lialun, Haeu aile kako sohot seilon haun ti usian. Ti lalape soliaian i awai kako ti kawatan ti lialui woukako kumahe nake ti soliai puasakako. ⁶ Masin ti Haeu hamoiha Krai, tin i hamoiha ali-ake kako lehe kako sohot seilon haun ti usian. Hoi

i namiloiwen i hatona kako kapi Krai ti tesol tonan ti neinia seilon nake kako pakata hetekiewen kapi Jises Krai. ⁷ I aile ukek ien lehe teka seilon ti imuh laha paxai ttoi lalape soliaian ti i aile kola hani kako usiwa puase Jises Krai.

⁸ Salan wanen, ti lalape soliai Haeu, Krai awai amuto ti kawatan ti lialui woumuto nake ti xoxoi namilomuto tetan kumahe ti soliai puasamuto. ⁹ I aile ukek ien lehe tap tel ti kako sameni aliake i. ¹⁰ Puki Haeu aile kako sohot seilon haun ti usian ti i pakateni kako hani kapi Krai Jises lehe lawe kako aile tatale waliko solian ti Haeu namiloiwen haniakako ailean.

Krai hukumini hetekie teka Ju ma teka kumahe Ju

¹¹ Teteka ti amuto takahama ti teka kumahe Ju, namiloi paxai aliakemua amuto ti imat lokon amuto tai soh ti Krai. Teka Ju axai amuto seilon tenen kumahe ti Haeu nake amuto tai aile teik kikilam ti kotiai uli walikoumuto ti usiai saun ti laha. Saun tenen ien tuahe ailelei seilon ape i kum pon hasawialaha. ¹² Lokon ien amuto pate xauxaun ti Krai ma tin melal ti teka Ju, teteka Haeu kilamiwen tetan. Amuto kumahe leili namil ti Haeu xinotiwon kapi laha ukei waliko ti i kakawen i hani laha. Amuto tua toto tehu pon itan ie, tap titioamuto ti Haeu ma tap waliko solian ti na amuto mon ukean. ¹³ Ti imat amuto pate xauxaun ti Haeu, tuahe aope ie amuto sohotuen seilon ti Krai. Ti i mat kaui kawatan ti lialui woumuto, i haxohi amuto hani kapi Haeu.

¹⁴ Puki Krai i aile hasolia wasolakako, teka Ju ma teka kumahe Ju ape i hukumini hetekie kako. I xaxaweni tenen saun ti he wawatak i seselai kako.

15 Ti matean i oxoxi kako ti hahitake nauna ma saun ti teka Ju lehe teka Ju ma teka kumahe Ju ati kako hukuma hetekie kapin. Ti aweisal tewau ien wasolakako i sawi. 16 Ti matean he kros, i hukumini teka Ju ma teka kumahe Ju ape i aile hasolia wasolakako hani Haeu. Aile ape i hatapo xaxaweni tenen saun ti he wawatak wasolakako. 17 Ti Krai he tehu pon itan ie, i kakaxi meng solian ti hasoliai wasole seilon ma Haeu. I kaxi hahani amuto teka kumahe Ju ma amite teka Ju. 18 Ao pe ati kako, teka Ju ma teka kumahe Ju, i pon kako kak sawi hani kapi Haeu tel Tamakako usiwa waliko Krai aile haniwen kako. Pake Holi Spirit tenenawe i huhuali kako.

Teka kahikahi Jises Krai masin ingi Haeu

19 Aile ape amuto teka kumahe Ju, amuto ape kumahe melal ti teka seilon ti Haeu, amuto hukuma hetekiewen. Amuto ape akikin ahuma ti Haeu. 20 Kako teka kahikahi Jises Krai, kako masin tehu ing hahatuhiai teka aposel ma teka kului ai kakai Haeu. Tehu kuku pate tuah se puki alia Jises Krai. 21 Masin hatesol soxi tini tehu ing i pakata hani tehu kuku tuah, tin masin pakataiakako hani Krai. Tehu ing ien i sohot ingi Haeu na namilokako ti Krai xox ahe. Ape Haeu paxai ukek kako seilon sawisawin. 22 Ti kako pakata hetekie hani kapi Krai, i hukumini kako hani kapi teka kahikahin liai lehe ti pohe Holi Spirit kako hatesol sohot hanowi tehu ing Haeu ingangai.

3

Puase Pol ti hualiai teka kumahe Ju

¹ Nga Pol kalabusake kaxiai meng solian ti Jises Kraiss hani amuto teka kumahe Ju. ² Amuto tioiwen ka ti lalape soliai Haeu i hani nga ailei tenen puasain tuah ien ti hualiamuto. ³ Nga tai hahongoen amuto ka Haeu hatakei haniwen nga namilon ti sale puase Kraiss, ti imat teka seilon kum tioi. ⁴ Na amuto ridai waliko ti nga taiwen, amuto xeu waliko ti titioak sale tenen namili Haeu ien. ⁵ Kemuk Haeu tai hatakei tenen namilon ien hani teka seilon. Tuahe aoape, Holi Spirit kola hatakei haniwen teka aposel ma teka kuluiai kakai Haeu.

⁶ Tenen namil ien masin, amuto teka kumahe Ju tin amuto uke hatesol waliko solian ti Haeu hani amite teka Ju. Haeu hukumini hetekiewen kako, aile ape waliko ti i kakawen i hani teka Ju seilon tetan, tin i hani teka kumahe Ju. Kako uke tesol waliko solian ien nake kako hong soh meng solian ti Jises Kraiss ape kako pakata hehetekie kapin. ⁷ Tenen meng solian ien nga kaxi ahuti hahani teka seilon. Ti lalape soliai Haeu i hani nga ailei tenen puasain ien ti kui pohen.

⁸ Kalak nga tel seilon naun ti lawe seilon ti Haeu, i hani nga kaxi haniai teka kumahe Ju sale lawe waliko solian ti Kraiss hahani teka seilon tetan. Tesol waliko solian ien se tuah wanen, seilon kum pon kolongenian. ⁹ Haeu kilamiwen nga ti nexi haxewai namilon ti sale puase Kraiss hani lawe seilon. Ti imat, lilian ti Haeu tanomi lawe waliko, i tai kola hahatakei tenen namilon ien hani laha.

¹⁰ Haeu aile ukek ien lehe aoape ie i aile kola lalape anesoan hani teka engel ma teka spirit liai pate pohen laha toto he maun. I kola hani laha ka ti lalape anesoan i kapiti hasolia hatesol seilon

tetan. ¹¹ Tesol waliko ien Haeu namiloiwēn ti imat wanen ape i hapuasa Jises Krai tel Masiwi ti kako aile haponowian.

¹² Ao pe aweisalukako hani Haeu ape hean. I pon kako matut kakanean pake kako pakata hehetekie kapi Krai ma namilokako xoxoan tetan. ¹³ Aile ape nga kamei amuto kum hahakawata tiamuto nake ti waliko lialun laha aile hahani nga. Kawatan ti nga kakau se hualiamuto.

Pol lotu huali ulea teka Epesus

¹⁴ Nake ti tesol waliko ien nga lokuha lotu hani tel Tamakako Haeu. ¹⁵ Hatesol seilon tenen tenen ti patul ma itan ie kaha kema hanawain ma axakaha ti tel Tamakako Haeu. ¹⁶ Kilan waliko solian ti Haeu haniai teka seilon tetan. Aile ape nga kamei i lehe Holi Spirit hakui leilomuto ti kui pohen. ¹⁷ Nga kamei hetekie i lehe Krai puas hamalum leilomuto nake namilomuto xoxoan tetan. Tin nga kamei hetekie Haeu ti hualiamuto lehe amuto waheni tatale i ma teka seilon liai. Na amuto aile ukek ien, amuto masin tea pata i wahai hani leilam ma tehu ing laha hatuhi he pekeun ailan. ¹⁸ Na masin ien, amuto hetekie teka seilon liai ti Haeu, amuto paxai tioi lalape wawahen ti Haeu, tap tel i pon kolongenian. I xoini lawe waliko ma tin tap tahi tapoan. ¹⁹ Kalak tap tel i pon tioi hatapoi wawahen ti Krai, nga lotu huali amuto lehe amuto ilameni tioi wawahen tenen ien. Nga kamei Haeu hualiamuto ti usi hatapoi namilon ma woun lehe amuto sohot seilon sawi-sawin tapein hanowi i.

²⁰ Kako sameniwa Haeu! I pon hawane ailei lawe waliko ti kui pohen ti i pupuas leilokako.

Ailean tetan i xoini hawane ti na kako kamei ma namiloi. ²¹ Kako sameniwa Haeu ti lawe waliko solian Krai ma teka kahikahin ailele lehe lawe seilon ti aope ie ma telok imuh laha paxai tioi lalape pohen ma soliaian. Kako sameni tatalewa i lian tehue. Salan wanen.

4

Ti axe Krai teka kahikahin hukuma hetekie

¹ Nga, tetel nga kalabusake ailei puase Krai, nga kakane hawane amuto, puas usi hawanewa saun ti Haeu pahan nake i kilamiwen amuto seilon tetan. ² Lawe paxai kewak seilon liai pamu tuah ape aile aluini haniwa laha. Ti usiai saun ti wawahen, kum leng kokosea na seilon aile talesi amuto. ³ Holi Spirit i pakateni hetekiewen amuto. Aile ape puas elieliwa akeni konginia soliai wawahen wasolamuto lehe amuto hukuma hamalum tatale.

⁴ Kako teka kahikahi Krai masin tupui seilon tel. Holi Spirit tenenawe i pupuas leilokako. Waliko solian ti kako monomon ukean tin tenenawe nake kako hatesol Haeu kilamiwen tetan. ⁵ Telawe Masiwi ti kako. Meng ti Jises Krai tin tenenawe kako soh ma baptais tenenawe kako hatesol uke ti hahitakan. ⁶ Tin masin telawe Haeu Tamakako. I Masiwi ti kako hatesol, i pupuas leilokako ma i hapuasa kako hatesol ti ailei puasan.

⁷ Tuahe Krai hani kako anesoin tenen tenen ti ailei waliko usiwa namilon. ⁸ Masin ti he leili pepai Haeu i ukek,

“Muhin ti i xoiniwa teka laha hil pahoi i, i kalabusi laha.

I lua hani tesol ti patul wanen

ape i hani teka seilon anesoin tenen tenen

ti ailei waliko.” *(Ps 68:18)*

⁹ Namiloi paxaiwa teik kakain ti i ukek, “I lua hani tesol ti patul wanen.” Ien i kola ka imat Kraiss mos hanimu tesol pate itan ti tehu pon ie. ¹⁰ Ape tetel i mos hanima itan he tehu pon ie, i tin tetel i lua hani patul wanen lehe i hapono hatapo lawe waliko.

¹¹ Kraiss tetel i hani anesoin ti puasain tenen tenen. Teka laha sohot aposel, teka laha kuluiwai kakai Haeu, teka liai laha kaxiai meng solian ti Jises Kraiss ape teka laha sohot seilon ti ngahaitiai teka kahikahi Kraiss ma hanaualahi. ¹² Tekaseilon ien laha apeseniai teka seilon ti Haeu ailei puasan lehe laha hukuma hetekie hahitake Kraiss ape namilolaha tetan i xox ahe tatale. ¹³ Na kako soh ti tel Nati Haeu ma kako tioi hawane i, Haeu hukumini hawane kako ape kako sohot unai Kraiss wanen. Na masin ien, kako usi hahawane namilon ma saun tenen i pahan ape kako sohot seilon tenen hanowi aliake i.

¹⁴ Na i sohot ukek ien, teka hanawi waliko tenen puputa laha kum puluti uke kako. Kako kumahe masin akaik kokol lehe namilokako i sohisohia hanowi koap tenen laman ma aupol tua towi ahuahua ma na kai pata tenen aupol tua paxeni lalolal. ¹⁵ Kako teka kahikahi Jises Kraiss, kako kaxiwa kakain salan hetekiewa wawahen. Ape lawe waliko ti kako aile, kako hanowi hawanewa ti Kraiss, tel masin ka pat ti kapitiakako. ¹⁶ Kraiss hukumini hetekie teka seilon tetan masin soxi tini seilon i pakata hetekie hani tupuan. Na soxi tini seilon teik teik i puas alua, tupuan hatel i kui. Tin masin kako teka kahikahi Jises Kraiss, na kako he wawahen ma aile aluini puasakako, namilokako

ti Haeu i xox tatala ape puasakako i kau anan.

Saun tetenen teka seilon ti Haeu usiwa

¹⁷ Nga kakane hawane amuto ti hahitake axe Jises Kraiss tel Masiwi, kum aile hahanowi teka seilon laha kum soh ti Haeu. Namilolaha tap pupuasan. ¹⁸ Ti lialui woulaha laha kum xe waliko tenen salan ma laha pate xauxaun ti Haeu. Patulaha pate ailan ti ukei kakain tenen sawisawin, aile ape laha kum tioi aweisali Haeu. ¹⁹ Laha kum hienake ailei saun lialun. Laha tua aile usiisi isiai pahe tupualaha ape laha aile tatala saun lialun tenen tenen.

²⁰ Ien se kumahe saun tenen amuto kewen sale Kraiss. ²¹ Nga tioi amuto hongoen sale puase Jises Kraiss ma laha hanauen amuto saun tenen sawisawin tetan. ²² Laha honewen amuto lioi xaxaweniai woumuto ti imat, saun tetenen ti imat amuto to ailele ti lialui isiai pahamuto. Saun tenen ien i hasele amuto ti usiai Haeu. ²³ Amuto haniwa Holy Spirit towiahu namilomuto ma tiamuto. ²⁴ I aile amuto sohot seilon haun lehe amuto unauan wanen ti ailei waliko tenen sawisawin masin ti kakaian hahanau amuto. Na masin ien, amuto sohot hanowi aliake i.

²⁵ Aile ape amuto lioi xaxaweniwa saun ti puputa. Lawe kakawa kakain salan nake Kraiss hukuminiwen amuto hahitakan. ²⁶ “Na amuto leng, lepetawa uke lengeamuto i itini amuto hani saun lialun.” *(Ps 4:4)* Kum hahapeti lialui lomuto he tiamuto. ²⁷ Kum hahani Satan kapiti hakalala amuto.

²⁸ Na amuto seilon ti xuxuina, aile lioiwa. Amuto puas elieliwa lehe amuto pon ngahati-amuto ape amuto huali uke teka tap soxi. ²⁹ Kum

hahapuasa kakain tenen i hialialu seilon. Ailewa kakain tenen solian ti i huali laha ma i hakui namilolaha ti Kraiss.

³⁰ Kum ailele waliko tenen i hatahanea Holi Spirit ti Haeu. Haeu hani amuto Holi Spirit ti kikilam ka amuto tetan wanen. Ape i pupuas leilomuto atengi tataen ti Haeu oxoxi tamusuke amuto ti lawe waliko lialun.

³¹ Aile ape kum wiwiliki seilon, kum leng lalolal, lomuto kum lilialu. Kum kak hilehil, kum kak alului seilon ma kum aile hahialialu laha. Lioi xaxaweni hatapoa tesol saun ien. ³² Amuto aile hasolia haniwa seilon, lawe kolawa saun ti tatahan hani laha. Oxoxiwa seilon ti kawatan ti waliko tenen lialun laha aile hani amuto masin ti Haeu oxoxiwen kako ti kawatan ti lialui woukako usiwa waliko ti Kraiss aile haniwen kako.

5

Kraiss haxewa hani kako saun tenen kako usiwa

¹ Amuto ape nati Haeu pate i waheni. Aile ape lawe amuto aile usiwa saun tenen i pahan.

² Amuto kolawa saun ti wawahen leili nanahiamuto masin ti Kraiss waheni kako ape i mat ti ukei totonakako. Haeu amuke tehu matean ti hualiakako masin ti i amuke waliko solian na kako aile nake kako waheni i.

³ Amuto ape seilon ti Haeu. Kum ailele saun lialun ti wawan hehin, kum ailele sikisiki tenen ti hienain ma kum halepelep. Na amuto kum aile, tap wanen laha misahi amuto ti tesol waliko ien. ⁴ Amuto kum ailele kakain tenen ti hienain, kakain tenen tap pupuasan ma kakain lialun ti wawan hehin. Amuto kak nonoa kemulik hani Haeu ti lawe waliko solian i hahani amuto.

⁵ Amuto tioiwa, na amuto to ailele saun lialun ti

wawan hehin ma sikisiki tenen ti hienain, amuto kum uke waliko solian ti Haeu kakawen i hani ma tap totonamuto kapi Krai ma Haeu. Tin masin na amuto to ailele saun ti halepelep nake seilon tenen ien masin ka i lolotui waliko ti i halepelep waxian. ⁶ Kum hahani laha puluti amuto sale tesol waliko ien ti kakain tenen kumahe sawisawin. Ti lengei Haeu i axi kawatan hani teka laha tahi kakaian ma to ailele tesol saun ien. ⁷ Kum papalahah kapi seilon tenen masin ien.

⁸ Imat, ti amuto to ailele tesol saun ien, amuto masin leili tilokoan. Tuahe aoape amuto pakata hetekiewen kapi Jises tel Masiwi, amuto ape he xewan. Aile ape amuto aile kolawa saun solian ti Haeu. ⁹ Nga kak ukek nake seilon ti he xewan laha aile waliko tenen mewenae solian, sawisawin ma salan.

¹⁰ Amuto tohongi elieliwa upiai waliko tenen Haeu tel Masiwi waheni na amuto aile. ¹¹ Kum huhukuma kapi teka laha ailele puasain ti tilokoan, saun tenen tap pupuasan. Hualiwa laha usiai aweisal solian lehe laha paxai tioi lialui woulaha. ¹² Waliko tenen lialun laha aile mumuneni, pate hahien kalak tuahe kaxian. ¹³ Tuahe kakain salan ti Haeu i kola hatakei lialui tesol waliko ien masin ti xewan i haxewa waliko ti he tilokoan. ¹⁴ Aile ape ti he xewan lawe waliko i sohot kouke. Masin ti leili pepai Haeu i ukek,

“Haiwa, teka masin ka amuto mamatih.

Xahatawa, teka masin ka amuto maten ti woumuto
lehe Krai i kapiti amuto ti he xewan.”

Haniwa Holi Spirit kapiti kako

15 Kanipetiwa sale nanahiamuto. Kum hanowi seilon tenen tap namilon. Namilomuto kewa solian ma xewan. 16 Ie se taun ti seilon to ailele saun tenen pate lialun. Aile ape amuto hapuasa aluiniwa teik taun ti amuto hina ailei saun solian. 17 Kum tua ailele waliko hanowi seilon tenen tap namilon, tohongi elieliwa upiai waliko ti Haeu tel Masiwi pahan amuto ailewa. 18 Kum un taxitaxia nake i itini amuto ti ailei saun lialun. Haniwa Holi Spirit puas leilomuto lehe i kapiti amuto. 19 Na amuto apuha hetekie, pakuiwa pak tenen tenen hani Haeu ti hakuamuto. Pak amuam hawanewa ti leili atemuto. 20 Ti lawe waliko kak kemulik haniwa Haeu tel Tamakako usiwa waliko ti Jises Kraiss tel Masiwi aile haniwen kako.

Nauna ti hanaui hahunatun

21 Amuto he huhualawa ma he hongohongoa kakaiamuto tel tel. I kola ka amuto paxai tioi masiwiwai Jises Kraiss, tetel amuto hong usi.

22 Amuto hehin, hong usiwa axoamuto. I kola ka amuto hong usi Haeu tel Masiwi. 23 Wawan i masin ka pat ti neiniai tel axoan masin Kraiss i pat ti neiniai teka kahikahin ape laha masin tupuan. Kraiss i tetel awaiakako ti kawatan ti lialui woukako. 24 Masin ti teka kahikahi Kraiss hong usi kakaian, tin masin teka hehin lawe hong usiwa kakai axoamuto.

25 Amuto wawan, waheni hawanewa axoamuto masin ti Kraiss waheni hawane kako teka kahikahin ape i mat ti ukei totonakako. 26 I mat lehe kako sohot seilon tetan. Ti kako hong soh kakai Haeu ape kako uke baptais, Kraiss xaxaweni lialui woukako ape i aile kako sohot seilon haun ti

usian. ²⁷ Pahan teka kahikahin paxaiialaha solian tel hehin na i sal, tap teik wikiwikin ma lolo, tinun tanenan solian wanen. Pahan laha hani hatapoa i tupualaha ape tap tel i pon tienialaha ti tenen na waliko. ²⁸ Masin ti Kraiss waheni teka kahikahin, amuto wawan waheniwa axoamuto hanowi ti amuto waheni aliake amuto. Tel wawan na i waheni tel axoan, tin i waheni aliake i. ²⁹ Tap tel i watakai aliake i, mewenae i ngahati aluini masin ti Kraiss ngahati aluini kako teka kahikahin. ³⁰ Kako masin tupuan ti i ngangahati.

³¹ Masin ti leili pepai Haeu i ukek, “Tel wawan i salili taman tinan ape i hukuma hetekie hani tel axoan lehe lalu sohot hanowi ka seilon tel.” (*Gen 2:24*) ³² Teik kakain ien hahanau kako waliko tenen pate buah sale hukumai Kraiss ma teka kahikahin. ³³ Tin i hahanau kako sale wawahen. Amuto wawan waheni hawanewa axoamuto hanowi ti amuto waheni aliake amuto ape amuto hehin kolawa lomuto haniwa axoamuto.

6

Nauna ti hanau akaik ma taman

¹ Amuto akaik, amuto hahitake Kraiss tel Masiwi. Aile ape hong usiwa kakai tamamuto ma tinamuto nake tenen saun ien i saun solian ti ala amuto ailewa. ² Haeu hani kako tenen nauna i ukek, “Hong tamaniwa kakai tamam ma tinam ape aile hasolia haniwa lalu.” Tetenen nauna ien Haeu hani kako hetekie kakaian i ukek, ³ “Na amuto aile usi, amuto tunahi tonain solian ma tin amuto to welu he tehu pon ie.” (*Exod 20:12*)

⁴ Amuto teka tame akaik, kum aile hahalenge natumuto. Amuto ngahati aluiniwa ma hanaua

laha lehe laha lap hetekiele saun ti Kraiss tel Masiwi.

Nauna ti hanau masiwi ma unauan

⁵ Amuto teka unau seilon, hong usi hawanewa teka masiwi ti amuto ti tehu pon ie. Aile aluini hawanewa puasalato masin na amuto ailele puase Kraiss. ⁶ Amuto puas aluawa kumahe mewenae na lato papaxai amuto lehe lato amuke. Ti leili tiamuto, ailewa waliko tetenen Haeu pahan nake amuto unau Kraiss. ⁷ Hana hatapoa tupuamuto ailei puasain hanowiwa ka amuto aile hahani Kraiss tel Masiwi kumahe tuahe seilon. ⁸ Nameniwa ka Haeu tel Masiwi i kahui kako tel tel ti soliai puasakako, kako unau seilon ma na kumahe.

⁹ Amuto teka masiwi, aile aluini haniwa teka unauamuto. Kum aile hahamatau laha. Nameniwa ka ati amuto hahitake Masiwi telawe Haeu, tetel i kum paxai nenexi seilon.

Pa ti Haeu hani hualiakako

¹⁰ Tiliai nauna tetak, tu xox tatalewa kapi Kraiss tel Masiwi lehe kui pohen i hakui amuto. ¹¹ Masin tel seilon ti hile i hana hatapo waliko ti hilehile, tin masin kako uke hatapoa waliko ti Haeu haniwen hakuiakako ti hil pahoiwai puase Satan, tel pulutiai seilon. ¹² Kumahe kako hihilei seilon, kako haელიel hawanewa hil pahoiwai spirit lialun ma teka masiwi ti laha, teteka laha toto he maun neini halialui teka seilon ti tehu pon ie.

¹³ Aile ape hapuasa hatapoa waliko ti Haeu haniwen hakuiamuto ti hil pahoiwai Satan lehe na kawatan tunahi amuto, i kum xoini amuto nake amuto tu xox tatale ti Kraiss. Ape na amuto

aile hatapoa puasamuto, tin amuto tu xoxox.
¹⁴ Apeasawa! Akeni konginiwa kakain salan ti Haeu hanowi teik tah ti konginiai luhuaamuto. Lawe ailewa saun tenen sawisawin lehe i awai amuto ti totohong ti Satan masin teik samen ti awaiwai patanawe seilon taun ti hile. ¹⁵ Amuto soh tatalewa meng solian ti Jises Kraiss. I hatona hasolia tiamuto lehe amuto tu xox hawane masin tel seilon ti i hana su taun ti hile. ¹⁶ Amuto soh tatalewa ti Jises Kraiss lehe i awai amuto ti Satan hanowi teik titieh i awai tel seilon ti inah leili hilehile. ¹⁷ Amuto soh eliel hawanewa ka Haeu awaiwen amuto ti kawatan ti lialui woumuto masin tel seilon i hana tehu kapu samen awaiwai patun taun ti hile. Ape hapuasawa kakai Haeu. I masin tea ngol weluwelun ti hile Holi Spirit haniwen paumuto. Aile ape amuto hapuasawa ti hil pahoiwai Satan.

¹⁸ Lawe lotu tatale haniwa Haeu masin ti Holi Spirit kakapiti amuto. Kameiwa Haeu hualiamuto ti lawe waliko. Na amuto lotu, hana hatapoa namilomuto haniwa Haeu. Lotu hualiiwa hatesol seilon ti Haeu ma kum lotu lilioa.

¹⁹ Ape tin lotu hualima nga lehe Haeu hani nga kakain tenen ti na nga kak taen nga kaxi matuke haxewai meng solian ti Jises Kraiss hani teka seilon. Ti imat laha tai xeu tenen meng ien. ²⁰ Haeu kilamiwen nga kaxiai meng solian ti Jises ape nga kalabusake tenen ien. Aile ape lotu hualima nga lehe Haeu hakui nga kaxi matuke tatalei meng solian ien masin ti i pahan.

Tilii kakai Pol

²¹ Tikikus tel soliai akikikako ti Krai, i kaxi hani amuto sale puasak lehe amuto tioi lawe waliko ti nga ailele. I tin i hani hahatapo tupuan ailei puase Krai. ²² Nga talo i hani kapimuto ti hahongoamuto sale pupuasamite ma tin haxoxoi namilomuto ti Krai.

²³ Nga kamei Haeu tel Tamakako ma tel Masiwi Jises Krai lehe lalu hatona hasolia tiamuto ma hakui saun ti wawahen hetekie haxoxoi namilomuto ti Haeu. ²⁴ Nga kamei hetekie Haeu aile hasolia hawane haniwa hatesol teka laha waheni Jises Krai tel Masiwi ti kako, wawahen ti tap tahi tapoan.

KAKAI HAEU
The New Testament in the Seimat language, The
Ninigo Islands, Manus Province, Papua New Guinea
Nupela Testamen long tok ples Seimat, Manus Provins,
Niugini

copyright © 2012 Wycliffe Bible Translators, Inc.

Language: Seimat

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-14

PDF generated using Haiola and XeLaTeX on 22 Feb 2024 from source files dated 31 Aug 2023

9fa179b2-dd20-5dbd-9745-1fb6d5f9b415